



**Illup sananeqarneranut akiusup minnerpaaffissaata inatsisitigut aalajangersarneqartup appartinneratigut pisortat inissiaataanni attartortittakkani ineqarnermut akiliutip appartinneqarnissaanut periarfissat misissoqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allangornerisa imminnut ataqatigiinnerat paasinarsisinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneru Inatsisartunut kingusinnerpaamik juli 2022-mi agguanneqassapput.**

(Inatsisartunut ilaasortaq Erik Jensen, Siumut)

## **Siullermeenera**

Siullermik Inatsisartunut ilaasortaq Erik Jensen, Siumut Inatsisartut aalajangiiffigisassatut siunnersuuteqarneranut Naleqqamiit qutsavigerusupparput.

Siunnersuut ineqarnikkut tunngassuteqartumik periarfissat assigiinngitsut misissoqqullugit aliangiffigisassamik siunnersuuteqarpoq, misissuinerillu inerneru Inatsisartunut kingusinnerpaamik juli 2022-mi agguanneqassasut siunnersuuteqarnermini kissaatigalugu.

Siunnersuummi Naalackersuisut misissuinissamik peqquneqarnissaannik siunnersuut oqaaseqarfiginnginnerani Naleqqamiit piviusut atukkagut pillugit imatut oqaaseqaateqarniarput.

Savinerup akia nunarsuami qaffarujussuarput taamatullu qisuit oqorsaatillu akii qaffarujussuarput, sanaartornermut atortussat nunarsuarmi akii qaffarujussuarput Covid19 atuutilerneraniit, tamannalu aallaavigalugu sanaartorneq akitsorujussuareersoq suli akisunerulerneranik kinguneqartussaavoq, naatsumik oqaatigalugu sanaartorneq akisoorujussuannornera suli akitsoriartoriartuinnartussaalluni siulittuutigineqarpoq.



Ukiuni kingullerni 15-ini aatsaat qisuit akii aatsaat taama qaffatigaat, taamatut sanaartornermi atortut akitsorujussuarneri sunniutissai imaannaanngitsuupput. Akit 40 procent angullugu qaffariarneri qaffakkiartuinnarnerilu nunatsinnut qisunnik atuilluta sanartorujussuusartuusugut annertuumik imaannaanngitsumillu akitigut eqqoreerpaatigut, tamannalu naleqqussarfinginngitigu inissialiornerit naammassiortutut akiinut annertoorujussuarmik qaffassaataasussanngortussanngorput.

Coroana atuutilerneraniit inuit nunarsuarmi angalajunnaarnertik taaserlugu aningaasat nutarsaanermut nutaanillu sanaartortitsinerminnik atuinernannik sanaartornermut atortussanik pisiortorujussuortoqanerulernerani akit qaffarujussuarneranik kinguneqartitsivoq, taamatullu sanasut sanaartornerullu iluani sulisut amigaataaqimmata akissarsiatigut qaffasinnerusumik inissisimalernerit piffissap sivikitsuinnaap iluani sanaartornermi atortut sanaartornerlu nunarsuarmi akisoorujussuanngerneranik kinguneqarpoq. Tamannalu aamma nunatsinnut sunniuteqalereerpoq sulili sunniutigisassai annertunerungaartut ornillutigut.

Qallunaat nunaanniit inissiarsuit akeqanngitsumik pissarsiarisimasat ineqartunut taamannaannaq ukiorpassuit akilersortinneqarsimasat najugaqartut pigilertariaqaraat Naleqqamiit oqaatigereernikuusarput aallaavigalugu tunniunneqarsinnaanerit, tunniunneqarnerallu ilutigalugu nutarsarnissaanut aningaaseriviit aqutugalugit attartorluni nutarsinnaaneri ilanngullugit aqutissiuunnissaanut misissuiffigineqarnissaat aqutissiuukkusupparput misissuineq ilutigalugu, neriuppugullu siunnersuuterput qineqqusaaruterpullu ilassilluarneqassasoq periarfissatsialaammat inuit najukkaminnik nammineq piginnilernissaanut aqutissiuinnaanngitsoq, kisiannili aamma akikinerusumik najugaqalernissaanut aqutissiuissusaasoq, nalitut kinguariit pigilersinnaasaat paarineqarnerat annertunerulernissaa pitsaaquterpassuit sunniutigisassai ilanngullugit qulaajaaffigineqarnissaa kissaatigalugu nerioqaagut tapersorsorneqassalluta taamatut ilassuteqarnitsinni ataatsimiitaliami ilanngullugu suliarineqarnissaa ilanngullugu ingerlanneqarnissaa aqutissiorneqassasoq neriuutigeqaarput.

Taamatullu sanaartornermi atortut nunarsuarmi akitsorujussuarneri ilutigalugu nunatsinni pissarititaasut akisugineqartartut maanna kiisami aatsaat taama periarfissagissaartigilerput



sikublock allallu nunatsinneersut atortut atorlugit alloriarnissatsinnut, taakku ilanngullugit qulaajaaffiginissaat Naleqqamiit ilanngukkusullugit kissaatigaarput tamakkiisumik ineqarnikkut pilersaarutinut ilanngutissallugit.

Nunaqarfinni sanaartorneq aallarteqqittariaqartoq Naleqqamiit pingaartipparput, taamaammallu sanaartornerup akitsorujussuarnerani sanaqateqarluni sanaartortarnerit aporfeqaleneri ilutigalugu ilungersuutigaarput qangatut nammineq illuliortarnerup eqquteqqinnissaa, nammineq illuliortussap 5 procenti akilerlugu qitiusumiit 95 procent tapiutigalugu ernialersorneqaranilu akilersugassaanngitsoq illutaartumiit ukiunut 20-inut nalikilliligassanngorlugu inissinnissaa Naleqqamiit isumaqatigiinniarnermi ilungersuutigaarput nunaqarfinni illunik akilerneqarsinnaasunik najorlugulu peqqinnartunik peqalernissaa Naleqqamiit aqqutissiorusukkatigu. Nunaqarfiit aamma pisariaqartitsipput akikitsumik nutaaliaasunillu angerlarsimaffeqarnissaat, taamaammat isumaqatigiinniarnermi annguttaakkatsinnik tusaaneqarnissarput kissaatigalugu anngussisaarpugut.

Taamatut oqaaseqarluta ineqarnikkut unamminartumik killiffeqarnitsinni siunissami pitsaanerusumik akikinnerusumillu najugaqartut ineqalernissaanut isummersoqataalluta siunnersuut ilalerlutigu akikillisaaqataasussamik siunnersuuteqarluta siunnersuummut ilaliivugut.